

## I MI NONI DISI...

I mi noni disi che la vita xe sai cambiada in 'sti ultimi ani. De pici ghe voleva andar iutar i genitori a lavorar in campagna o a pescar. In casa no iera réfrigorifero, ré lavatrice, rélavastoviglie e no parlemo poi de radio e television.

Ciolemo per esempio come se lavava la roba dopo la guera. Le done gaveva el mastel e le meteva su una tola per lavar. Prima peòbisognava scaldar l'acqua. Se andava ingrumar fraschi e se faseva le fasine per portar a casa, e ti ga voia far fogo per scaldar l'acqua in caldier! Per lavar se usava el savon fato in casa e la scartassa. Per far diventar la roba bianca, se faseva la lisciva con la senera e per farla ancora meio, quando se resentava se doperava le balette de perlin: beati chi che le gaveva! El giorno dela lissia se saltava el pranzo perchéla dona la iera sfinida e no la gaveva tempo de cusinar.

Una volta se faseva tanta fatiga per tuto ma co iera festa iera tanta alegria e la gente se divertiva e se iutava. Se magnava a tavola tuti insieme, magari una minestra, se beveva un bicer de vin, se balava, se ciacolava e se cantava ore in compagnia. Anche i fioi stava insieme e i se giogava con le scinche, la tria, le manete, le bele statuine, con la bala e con le pupe de strasa. Ogi la gente no ga mai tempo, in fameia un xe de qua un xe de là, i riva casa un prima un dopo e i magna quel che i trova. I fioi zoga ognidun per conto suo, con tuti quei afari elettronici. Noi sa far un canto senza el computer, peò sa tante altre robe.

I mi noni disi che forse iera meio quando se stava peso.